



AUTORITETI MEDIAVE  
AUDIOVIZIVE  
Nr.Prot. 2300 Data: 1.08.24

REPUBLIKA E SHQIPËRISË  
KUVENDI  
SHËRBIMI LEGJISLATIV  
SHËRBIMI JURIDIK

Nr. 1172 / Prot.  
2

Tiranë, më 31/07, 2024

Lënda: Dërgim rezolute

AUTORITETIT TË MEDIAVE AUDIOVIZIVE

Tiranë

Bashkëlidhur ju dërgojmë:

Rezolutë “Për vlerësimin e veprimtarisë së Autoritetit të Mediave Audiovizive për vitin 2023”.

Duke ju falënderuar për bashkëpunimin,

SEKRETARI I PËRGJITHSHËM

Genci GJONÇAJ





REPUBLIKA E SHQIPËRISË  
KUVENDI

MIRATOHET

KRYETARE

Lindita NIKOLLA



**REZOLUTË**

**PËR VLERËSIMIN E VEPRIMTARISË SË AUTORITETIT TË MEDIAVE  
AUDIOVIZIVE PËR VITIN 2023**

**Kuvendi i Shqipërisë,**

Duke njohtur AMA-n si një institucion të pavarur dhe autoritet rregulator në fushën e shërbimeve të transmetimeve audio dhe audiovizive dhe shërbimeve të tjera mbështetëse në territorin e Republikës së Shqipërisë;

Duke theksuar se ligji i ri nr. 30/2023, i miratuar në Kuvend, "Për disa ndryshime dhe shtesa në ligjin nr. 97/2013 "Për mediat audiovizive në Republikën e Shqipërisë", i ndryshuar, bën të mundur një përafrim të mëtejshëm me direktivën e BE-së, veçanërisht në drejtim të rritjes së transparencës së pronësisë së ofruesve të shërbimeve mediatike, mbrojtjes së fëmijëve, etj.;

Duke theksuar rëndësinë e miratimit gjatë vitit 2023 të Kodit të Ri të Transmetimit si një akt shumë i rëndësishëm, i cili përcakton parimet, rregullat, kërkesat dhe praktikat e transmetimeve audio dhe audiovizive në Republikën e Shqipërisë;

Duke theksuar nxitjen dhe mbështetjen e standardeve profesionale të transmetimeve audiovizive përmes praktikave më të mira ndërkombëtare,

**Vlerëson:**

Punën e bërë nga AMA për miratimin e Kodit të Ri të Transmetimit, i cili u miratua pas një procesi të gjatë këshillimi dhe diskutimi me të gjithë aktorët dhe reflekton në mënyrë të ekuilibruar pritshmëritë e të gjitha grupeve të interesit, evoluimin e kuadrit ligjor vendas dhe ndërkombëtar, si dhe rekomandimet e ekspertëve vendas dhe të huaj sipas standardeve dhe nevojave të tregut audioviziv shqiptar.

Punën e AMA-s si pjesë raportuese e Grupit Ndërinstitucional të Punës për Integrimin Evropian (GNPIE).

Punën e bërë nga AMA dhe rolin ndërmjetësues të saj në lidhje me problemin e mungesës së interpretëve/përkthyesve për transmetimin me gjuhën e shenjave, përmes të cilit është bërë

i mundur që edhe dy televizione të tjera kombëtare përveç RTSH-së të nisin transmetimin e edicionit informativ të shoqëruar me interpreten e gjuhës së shenjave, duke përbushur kështu të drejtën për informim të personave me aftësi të kufizuar në dëgjim.

Bashkëpunimin e AMA-s me institucionet e tjera në hartimin e ndryshimeve ligjore të ligjit nr. 97/2013 “Për mediat audiovizive në Republikën e Shqipërisë”. Ligji i ri u miratua në Kuvend më 13 prill 2023 dhe bën të mundur përafrimin e pjesshëm me Direktivën (BE) 2018/1808 të Parlamentit Evropian dhe Këshillit, datë 14 nëntor 2018, si dhe, ndër të tjera, rritjen e transparencës së pronësisë së ofruesve të shërbimeve mediatike.

Bashkëpunimin e AMA-s me AKEP-in në inspektimet e kryera në lidhje me fenomenin e piraterisë, si dhe punën e bërë në lidhje me fenomenin tjetër që po haset në këtë periudhë, atë të shtimit të numrit të operatorëve piratë që transmetojnë nëpërmjet internetit dhe faqeve të ndryshme që ofrojnë produkte audiovizive pa autorizimin e AMA-s.

Punën e bërë nga AMA në inspektimin dhe monitorimin e subjekteve audiovizive në lidhje me cilësinë e sinjalit, si dhe kontentin e përbajtjes së programeve.

Bashkëpunimin e AMA-s me rregullatorët e rajonit dhe të vendeve të BE-së për çështje të rëndësishme të fushës së mediave audio dhe audiovizive me të cilat ata po përballen.

#### **Kuvendi i rekomandon AMA-s për vitin 2024:**

1. Të japë kontributin e saj në ndryshimet e ligjit nr. 97/2013 “Për mediat audiovizive në Republikën e Shqipërisë”, i ndryshuar, në përputhje me standarde tona të BE-së për adresimin e problematikave të rëndësishme që kanë të bëjnë me çështje, si: transparenca e financimit të mediave, përqendrimi i lartë i pronësisë së mediave, reklamat publike, rritja e pavarësisë së rregullatorit, etj.

2. Të luajë një rol proaktiv në organizimin e tryezave të diskutimit me operatorët audiovizivë dhe aktorë të tjerë të rëndësishëm për nxitjen e procesit të matjes së audiencës, si një instrument i rëndësishëm për vetë operatorët, por dhe me ndikim të drejtpërdrejtë në mbarëvajtjen dhe transparencën e tregut audioviziv në Shqipëri.

3. Të marrë masat e nevojshme për zbatimin e Kodit të Ri të Transmetimit nga ana e OSHMA-ve, veçanërisht lidhur me luftën ndaj diskriminimit dhe promovimit të barazisë gjinore, parandalimin dhe luftën ndaj gjuhës së urrejtjes në transmetimet audiovizive, të cilat janë përfshirë për herë të parë në Kodin e Transmetimit.

4. Të monitorojë zbatimin nga ana e OSHMA-ve të Kodit të Ri të Transmetimit, veçanërisht pikat të cilat lidhen me mbrojtjen e fëmijëve, që janë zgjeruar në Seksionin “Fëmijë në mediat auditive” dhe nënndarjet përkatëse.

5. Pas përfundimit të kursit të formimit për 15 interpretë të tjerë me gjuhën e shenjave, të vazhdojë të ndjekë procesin e plotësimit me interpretë/përkthyes për transmetimin me gjuhën e shenjave në mënyrë që ky detyrim ligjor për të drejtën për informim për personat me aftësi të kufizuar në dëgjim të përbushet plotësisht.

6. T'i kushtojë vëmendje të shtuar përbushjes së masave përkatëse të Planit Kombëtar për Personat me Aftësi të Kufizuar (2021-2025), të miratuar nga Këshilli i Ministrave, masa të cilat lidhen drejtpërdrejt me aksesueshmërinë në informacion dhe në komunikim të kësaj kategorie (personave me aftësi të kufizuar).

7. Të vijojë të japë kontributin e saj si pjesë e grupit ndërinstitucional të punës përlirimin e brexit digital divident dy (DD2), si një proces me rëndësi dhe me ndikim të drejtpërdrejtë në zhvillimin ekonomik, social dhe kulturor të vendit, si dhe në ofrimin e shërbimeve me shpejtësi të lartë interneti.

8. Të ketë në vëmendje rritjen e vazhdueshme të cilësisë dhe efektivitetit të rolit rregulator të saj, si dhe përmirësimin e mëtejshëm të kapaciteteve njerëzore dhe sistemeve të mirëfunksionimit të brendshëm të autoritetit.

9. Të luajë një rol proaktiv, nga njëra anë, duke reaguar me vendosmëri në rastet e kanosjeve dhe sulmeve kundër gazetarëve dhe nga ana tjetër, në përmirësimin e kushteve të punës për gazetarët, veçanërisht duke forcuar mbrojtjen e të drejtave të punësimit dhe sociale të tyre.

10. Të ketë në fokus të punës së saj nxitjen dhe mbështetjen e standardeve profesionale të transmetimeve audiovizive nëpërmjet praktikave më të mira ndërkombëtare, si dhe sigurimin e diversitetit në transmetimet audiovizive.

11. Të punojë për përmirësimin e kuadrit rregulator në drejtim të forcimit të luftës kundër piraterisë televizive në përputhje me standartet e BE-së dhe praktikat më të mira ndërkombëtare.

Miratuar në datën 26.7.2024